

## 1 PITA

### Pita eter kiyi bas rasem siglou.

*Kiyi late tuma.*

Gwote siglou Pita ere bas rasen akeite provins temenem Kristen emne newopitim. Romri gavman tame eme ete Kristen emne yaper nenbetem, Kristen eme nogwape mus eisau meten pap yaper tebetem, eke Pita ere emne gwote siglou bas rasen emne mureken tuma emne bas rasem Gwotepte ete nowsel nema kantri Turki wobe.

Ere emne etep bas rasem. Kem Jisas erne som abobetete. Jisas eter ere mus eisau meten taskwuren sam, ere wou sene peten wayen yim. Ere sene yate, ere nemne sene pette. God ere kemri kenawaike abobekap ere seilabe. Kem erne mesginte, o erne beke kip mesgin, ere etep late, eke tatame eme kemne yaper nenbe. Kem erne beke kip mesgin, ere kemne tokwo yenbosubuwai Hevenke newote nenbe. Eke kem God eri wule noub tobote. Pita ere etep bas rasem.

*Pol ere gwote siglouke bas rasem tuma gwo.*

Sapta 1:1—2:10. Nema God eteri tatame tem, eke nema wule yenbo nenen yin wos yenbo yuri pette.

Sapta 2:11—3:22. Nema tatame etemri borke yibetete, nema wule yenbo tobote.

Sapta 4—5. Kristen tatame emne seilabe wos eisauke ten eme mus metem.

<sup>1</sup> An Pita, Jisas Kraiss eteri aposel yaku kerebe tame. Kem God eteri tatame, an kemne gwo siglou bas rasbe. Kem keremri maim kom mesginin yikwute yakwutem. Kem provins nogwape, Pontus, Galesia, Kapadosia, Esia, Bitinia etek yin kem ek ya tamekap etek tetan. <sup>2</sup> Kiyisapewai Apei

God ere kemne abon kenem, ere kemne eteri tatame tete wom. Jisas Kraiss eteri nep kemne eyaren kem yenbo tete, kem eteri tuma noub meten tobote, eke God Eteri Wou ere kemne eyarem, kem tatame yenbowai ek tem. God ere kemne kobo kenake lan kemne som noub nente. Kem pap yenbo meten temente. An etep abobe.

*Nema noub som temente komke yite kouten.*

<sup>3</sup> Nemri Aneyen Jisas Kraiss eteri Apei, eteri Keryen God erne nema pir wobe. Ere nemne kobo eisau labe, ere Jisas Kraiss erne wou sene newom, eke nema porere yenbo peten eteri tatame tem. Etep ten, God ere nemne panen yite abobe, eke nema eteke kouten. <sup>4</sup> God ere eri tatame emne nentekap, emne newotekap, ere nemne etep kir nente nenbe. Ete wos e yaper beke kip ten, kupa ten, ete wos e seba beke kip te. Berai. Ete wos God ere Hevenke lakerebe, ere kemne newote nenbe. <sup>5</sup> Ye. Kem God erne kenawaike abobe, eke God eteri mure eisauke ere kemne noubwai lakeren yin kemne sene pette nenbe. Kraiss ere sene yate nenbe yabel, ere kom genik kemne sene peten kem yenbo tete.

<sup>6</sup> Kem ete tuma abon metekwasen letewo oksubu tete. Gwopte yabel God ere wote, be wos be wos yaper e kemne kerake ten kem pap yaper mette. <sup>7</sup> Beke wos yaper kemne tebe? Tame eme gol kerke lisin seilabekap, God ere kemri kenawaike abobe wule etepke seilate. Kem erne kenawaike abobe, o kem erne bepou me abobe, ere eteke late. Gol e tokwo eisauke tukbe wos, ete wos som beke temen. Kerem seten kenawaike abobe wule e gol erne teitkwunten. Be wos yaper kemne tete, kem God erne som kenawaike abote, kem kuyese taskwurte. Etep tete, Jisas Kraiss ere genik tete yabel kem sig yenboken sig eisauken pette nenbe. <sup>8</sup> Kem Jisas erne mak laten, kem erne kenake abobe. Gwopte kir, kem erne mak laten. Kem

erne kenawaike abon metekwasen letewo oksubu tebe. Etep tetangkap, kem kuyese beke wusou. <sup>9</sup> Kemri erne kenawaike abobekap, God ere kemne sene pette nenbe, kem yenbowai som temente nenbe.

<sup>10</sup> God ere tatame emne pap yewon sene pette tuma, God eteri kiyi temenem tuma wusoubetem tame eme e yuri keremne tete woskap wusoubetem. Ete tuma somo eme noub beke met. Eme somo som sopen wometbetem.

<sup>11</sup> Krai Eteri Wou ere etemken temenem, etepkap Krai eteri mus metemkap, eter apeilake eisau temenemkap, eme etep noub wusoubetem. Wusoubetem, eme abon etep wometbetem. Ete wos makapke tete? Beke God ere etep nente wobe? Eme etep wometem. <sup>12</sup> God ere emne etep wom. Kerem wobe tuma e keremne maim kobo beke kip la. Berai. E yurik tete tatame etemne kobo late nenbe tuma. Etep wom. E yurik tete wom tatame, e kerem. Etem wusoubetem tuma, God eteri tuma yenbo wusoube tame eme kemne wusoubetem. God ere Eteri Wou erne won yam, ere Heven mesginen yan eteri murek eme kemne ete tuma yenbo wusoubetem. Etem kemne wusoubetem tuma, God eteri komri tame eme noub mette abobe.

*God ere nemne tatame yenbo tete eke wopetem.*

<sup>13</sup> God ere etep nenem, e kem porere noub abote. Kem maim mane abote. Jisas Krai eter genik yate yabel God ere kemne pap yewon noub nentekap, kem etepwou kenawaike abote. <sup>14</sup> Kem tuma wan wurik metbe tatamekap tete. Kiyi kem worisubuk temenem, kem wule yaper nente abobetem. Kem etepkap sene mane tete.

<sup>15</sup> Kemne wopetem tame ere yenbosubuwai, kerem kir, kem tatame yenbosubuwai tete, kem wule yenbosubuwou nenbetete. <sup>16</sup> God eter bas rasten tuma etep wobe. Aren, an yenbosubuwai. E kerem kir, kem yenbosubuwai tete. Etepke bas rasten.

*God ere nemne tokwo eisauke tuken petem.*

<sup>17</sup> Kem God erken namdebe, kem erne Apei wobe. Ete Apei ere akei tatame etemri nenbekapwou lan noub sin labe. Eke kem erne aken eri tuma noub meten nenbetete. Kem keremri maima komke beke te, kem ek ya tamekap tetan. <sup>18</sup> Yeiwarege etem kemne newom wule e oksubu yim, eke God ere kemne sene tuken petem. Yaper tebe tokwo, golken silvaken, etepkap tokwok ere kemne beke tuk. Berai. <sup>19</sup> God ere kemne tokwo eisauke tukem. Ere kemne Krai eteri nepke tukem. Juda etem God erne kwar pebe wule eme sipsip yen yenbowai, wus me lak bakbe, eke peten God erne kwar pebe. Krai ere ete sipsip yenkap, ere yenbowai. <sup>20</sup> God ere nelken selken mak seikmenem, ere Krai erne won ere keremne kobo late wom. Wom, gwopte nowsel omote mekin mekinemke, Krai ere genik tem. <sup>21</sup> Eterke kem God erne kenawaike abobe. Ere sam, God eter ere erne wou sene newon ere sele meike sene wayen yim, God ere erne sig newom. Etepkap, kem God erne kenawaike etep abobe. Ere nemne sene peten, noub tobote womkap, ere etep nente nenbe. E etepwou eterne kenawaike abobe.

*Nema Kristen geisimase emne pap yewobetete.*

<sup>22</sup> Kem wule seken noub meten tobobe, eke kemri porere yenbo tem. Etepkap tem, kem Kristen geisimase emne kuyese kobo lan noub nenbetete. Kem awoawo noub pap yewobetete. Kem kobo bepou mane late. Kem pap yenbo ten emne pap yewon noub nenbetete. <sup>23</sup> God eteri som temente mureken tumak kem tatame ager tem, kem eteri yen tem. Keremri ar ere beke sa. Ere som temente nenbe. <sup>24</sup> God eteri tuma etep wobe.

More tatame eme menamane walkukap. Emri mure e me walku eme sok ten yeirbekap, tatame eme sabe wule mureken porereken akei kir sabe.

<sup>25</sup> Tatame eme sate nenbe, Keryen God eteri tumawou ere som temente nenbe. Etep wobe. Ete tuma eme kemne wusoube tuma yenbo.

## 2

*Aneyen ere mureken ake nawo kwatkap.*

<sup>1</sup> Etepkap, kem wule yapersaper mane nente. Kem tuma mane yikwokwote. Kem tatame emri vos, emri nenbekap mane malte. Kem kerebe tuma mane wote. Etepkap wule kem mesginte. <sup>2</sup> Geibele yen eme muk ate kerabekap, kem God eteri wule yenbowou pette eteke kerate. Eke kem peten noub sebetete, etepkap kem Kristen sespe tetek, God ere kemne sene pette. <sup>3</sup> Aneyen eter pap yewobe wule kem seilam. Ete wule e yenbowai.

<sup>4</sup> Kem erne mekinke temente. Eri mure eisau, ake nawo kwatkap. Tatame eme erne yaper won magel tayem. God eter ere erne kenem, erne sig yenbo tem. <sup>5</sup> Kerem, kem mureken ake eteri teban, magel, taikwokap. God ere kemne peten eteri ake etek kerebe, Eteri Wou ere ete akek temente. Kem God eteri yaku kere tatame yenbo ten kem God eteri yaku keren erne sukye worate. Etep tete, God ere Jisas Kraiss eterke ere kemne metekwaste nenbe. <sup>6</sup> God eteri tuma etep wobe.

Kem ek la. An nawo kwat yenbowai peten Saion komke ake kerebe.

Tatame eme erne kenawaike abote, eme pap yaper beke kip te.

Eme sebera beke kip ya.

<sup>7</sup> Kem kenawaike abobe tatame, kem etep wobe. Ete kwat ere Kraiss, ere tame yenbosubuwai. Kenawai beke abo tatame eme gwopkap.

Ake kerebe tame emri mo won magel tayem kwat, ete kwat ere nawo kwat tem.

<sup>8</sup> Sene God ere tuma etep wom.

Ete kwatke tatame eme tewo etek tebetete nenbe.

Tatame emne tewo ete kwatke tebete pitin warte nenbe.

Ye. God eter kiyi womkap, eme eteri tuma beke met, eke eme tewo etek tebete pitin warem.

*Nema God eteri wakse.*

<sup>9</sup> Kerem, kem God eter kenem tatame. Kem Keryen God eteri akek yaku kerebe tatame. Kem tamesip yenbosub-uwaike tetan. Kem God eteri tatame. Kiyi kem kerneirik temenem. Sene God ere kemne wopetem, kem eteri yabel genikapke tetan. Etepkap, eter nenbe wule yenbo kem tatame nogwape emne etep wusoubetete. <sup>10</sup> Kiyi kem God eri tatame beke te, sene kem God eteri tatame tem. Kiyi kem God eteri pap yewobe wule beke met, gwopte God ere kemne pap yewobe.

*Nema God eteri yaku kere tame tete.*

<sup>11</sup> Ari tamesip yenbo, gwote nowsel e keremri maimenow sel seken berai. Kem genek ya tamekap. Kem bepou me tetan. Heven e keremri maimenow kom seken. Eke, an kemne wobe. Kem nowselri wusomri wule yaper mane nente. E wule yaper ere keremri wou eterken naibe.

<sup>12</sup> Kem Kristen berai tatame emken tementen, kem emne wule yenbowou nente. Eme kemri nenbe wule yenbo late, kap kau eme kemne tuma yaper won bepou me etep wote. Kem wule yaper nenbe. Ete tuma yikwokwon wote, yuri God ere emne yan late yabelke eme kemri nenbe wule yenbo sene abon God erne pir won eri sig yenbo wote nenbe.

<sup>13</sup> Kem Aneyen Jisas eteri wakse, eke kem nowselri apeilake emri tuma nouw meten etep nenbetete. Kem nowselri apeilake eisau eri tuma meten nenbetete. <sup>14</sup> Eri won yam gavman yaku nenbe tame etemri tuma kir, kem nouw meten tobobetete. Ete tame eme wule yaper nenbe

tame emne yaper awosein nenbe, wule yenbo nenbe tame emne eme wule yenbo awosein nenbe. <sup>15</sup> God ere gwopkap wule abobe. Kem wule yenbo som tobobetete, eke tumasubu wobe worisubu tame eme tuma rebe tete. <sup>16</sup> Kem tege tamekap tete. Etepkap tete, kem wos yaper mane berasen nente. Kem God eteri yaku kere tatame temente. <sup>17</sup> Kem nogwape tatame emne tuma yenbowou wobetete. Kem Kristen geisimase emne pap yewon kobo labetete. Kem God erne me akbetete. Kem nowselri apeilake eisau erne tuma yenbowou wobetete.

*Nema Krais eteri wule tobon mus meten taskwurte.*

<sup>18</sup> Kem yaku kerebe tatame, kem keremri yaku lakerebe tame etemri kulke wurin temente, emne tuma yenbowou wobetete. Kemne wule yenbo nenen lakerebe tameken wule yaper nenen lakerebe tameken kem emne tuma yenbowou awosein wobetete. <sup>19</sup> God ere etep tebe tatame emne metekwasbe. Eme God erne abon wule yaper beke nen, tame eme emne yaper bepou me nenbe. Etep tebe, eme taskwuren eme beke sumarku. Etep tebe tatame God ere emne metekwasbe. <sup>20</sup> Kem yaper nente, eme kemne yaper awosein nente, kem taskwurte wote, God ere kemne sig yenbo kuyese beke kip wo. Kem wule yaper beke kip nen, eme kemne yaper bepou me nenen kem taskwurte wote, etepkap God ere kemne metekwaste nenbe. <sup>21</sup> Metye. Krais ere kemne kobo lan mus kenake metem. Eke kem eteri wakse tem. Eke eter nenbetemkap, kem etep kir nenbetete. God ere kemne etep nente wobe. <sup>22</sup> Krais ere wule yaper beke wuri nen. Ere tuma beke wuri yikwokwo.

<sup>23</sup> Eme erne tuma wom, ere emne awosein beke wo. Eme erne yaper nenbetem, ere mus metbetem, ere emne yaper awosein beke wo. Ere kenawaike etep abobetem. God ere akei tatame emne noub seilate. E eteri wos. Ane

yaper nenbe tame emne ere yaper sein nente o beke kip nen, e eteri vos. Ere etepke abobetem. <sup>24</sup> Metye. Tame eme erne mek kwanem, ere nerem nenbetem wule yaper akei peten sen ek sam. Nema wule yaper mesginen wule yenbowou nenbetete, eke ere nemne kobo lan sam. Ye. Eter mus eisau metem, eke nema tatame yenbo tem. <sup>25</sup> Kem sipsikap temenem, kem kom mesginen boulke belen yimkap, sene kem sipsip lakerebe tame erne sene yan lamkap. Jisas ere Keremri Wou Noub Lakerebe Tame.

### 3

#### *Taken tameken emne wobe tuma.*

<sup>1</sup> Kem tame yiten ta kem tame etemri kulke temente. Kem emne tuma som mane wote. Etepkap God eri tuma beke met tame kau eme kemri nenbe wule yenbo latek, eme God erne kir abote. <sup>2</sup> Ye. God erne aken wule yenbo nenbe ta, tame kau eme kemne etep late, etepkap eme God erne kenawaike abote. <sup>3</sup> Kem wusom yenbo labe kerap yenbotanbo mane kenake wolote. Kem tare take mane gusen peiken yate. Kem golke nenem kerap yenbo mane som wolote. <sup>4</sup> Tatame eme kemne yenbo late, kem gwopke tete. Kem pap yenbo ten tuma elen me namdete. Ete wule e yaper beke te golke nenbe gabo yase yenbokap. Eke God ere ete wule metekwasbe. <sup>5</sup> Kiyi temenem ta yenbosubu eme etepkap wule nenbetem, etepkap tatame eme emne yenbo labetem. Eme God erne kenawaike abon eme tame etemri kulke wurin temenem. <sup>6</sup> Sera, Abraham eteri ta, te etepke abobetem. Te tame eri tuma noub meten tobon erne keryen wobetem. Kem etepkap wule yenbo tobon be vos be vos beke ak, kem Sera etetri yenkap tete.

<sup>7</sup> Etepkap, kem taken tame, kem keremri ta emne noub abon emne yenbo nenbetete. Ta eme mure eisau berai,



etepkap kem emne yaku kobo lan emne tuma yenbo wote. God ere emne kobo kir lan keremken kir sene pette, eke kem emne etep nente. Kem emne wule yenbo beke nen, kemri God eterken namdete tuma ere beke kip met.

*Nema tatame etemne wule yenbowou nenbetete.*

<sup>8</sup> Tuma omote nenbe, an kemne etep wobe. Kem akei kem selpap wurisubuk temente. Kem awoawo kobo labetete. Kem geisimase emne noube nenbetete, emne pap yewobetete. Kem maimewou mane abote. <sup>9</sup> Tatame eme kemne yaper wote, kem emne yaper awosein mane wote. Eme kemne yogwu wotoute, kem emne yogwu awosein mane wotoute. Eme kemne yaper nente wote, kem God erne womettek, ere emne yenbo nente. God ere kemne etep tete eke wopetem. Etepkap, ere kemne kuyese yenbo nente nenbe. <sup>10</sup> God eteri tuma etep wobe.

Eike tatame eme noube temente abobe, eme yabel yenbo late abobe, eme beke nenen ek late?

Eme tuma yaper mane wote.

Eme tuma mane yikwokwote.

<sup>11</sup> Eme wule yaper magel tayen wule yenbo nenbetete.

<sup>12</sup> Wule yenbo nenbe tatame emne Keryen ere lakerebe.

Emri wobekap ere etep noube metbe.

Wule yaper nenbe tatame emne Keryen God ere ragi eyin, pap wayebe.

Etep wobe.

*Nema wule yenbo nenen, nema mus mette, e tuma berai.*

<sup>13</sup> Kem wule yenbo noube nente abobe, eike eme kemne yaper beke kip nen? <sup>14</sup> Kem wule yenbo nente wote, sene kau tame eme kemne yaper nente wote, kem pap yaper mane tete. Kem emne mane akte. God ere kemne noube nente, kem metekwaste. <sup>15</sup> Kem keremri porerek etep abobetete. Krais ere areri Aneyen. An eteri kulke

tetan. Etep abote, tatame eme kemne wolate. Beke kem Kraiſ erne kenawaike abobe? Etep wolate, kem emne noub awoſein wote. Kem kiſi noub abon emne noub awoſein wote. <sup>16</sup> Kem emne wule yenbok elen me awoſein wobetete. Kem wule yenbowou nenbetete, etepkap kemri porere yenbo temente. Kem etep nente, eike tatame eme kemne tuma yaper wote, eme kemri wule yenbo lan sebera yate. Kem Kraiſ eteri wakſe, kem wule yenbowou nenbe, eme kemne tuma yaper bepou me wobe, eke eme sebera yate. <sup>17</sup> Kem wule yenbo nenbetetek, God ere kir wote, eme kemne yaper nente wote, e yenbo. Etepkap kem ſig yenbo pette. Kem wule yaper nente, eme kemne yaper awoſein nente, kem ſig yenbo beke kip pet. Berai. Kem ſig yaper pette.

*Kraiſ ere ſan ſene wayen yim, nemne ſene petem.*

<sup>18</sup> Kraiſ eter kir ere muſ metbetem. Eter ere keremri nenbetem wule yaperke ſam. Tewo wurik ere akei nenbetem wule yaperke ſam. Etep tem, ete omom. Ere ſene beke kip ſa. Ere tame yenbo, ere nemne tame yaper kobo lan ſam. Etepkap, ere nemne God eterke panen yibe. Eteri wuſom eme pen ſam, ſene God ere erne wou ſene newom, ere ſom tetan. <sup>19</sup> Eteri Wou ere gabo komke yin etek ten yamenem kiſi ſaiwom tatame emne tuma wuſoubetem. <sup>20</sup> Ete gabo, Noa ere temenem yabel eme kelpet tatame temenem. Temenem, eme God eteri tuma naſwoyin beke nen. God ere emne koulawoyim, eme ſelpap yenbo beke pet. Ete yabel Noa ere ſip eiſau wuri nenem, tatame ep yekwo let ep yekwo let bor mur kei (8-pela) etemwou eme ſipke wurim, eme okke beke an ſa. Etemwou eme kelpet tem. <sup>21</sup> Eme ok meſginin kelpet temkap, e gwopte kem baptaiſ ok wirube wulek tatame ager tebe. Baptaiſ ok wirube wule e ok wibe wule berai. Baptaiſ ok wirube wule e gwopkap. Jiſaſ Kraiſ ere ſan ſele mei meſginin wayen

yim, eke tatame eme God erne wolate, ere emne selpap yenbo newote. Etep ten emne baptais ok wirute. <sup>22</sup> Jisas ere Hevenke yawom, ere God eteri yamame yekwok siten. Etek siten, God eteri komri tame, keryen tame, mureken tame, akei eme Kraiss eteri kulke tetan. Eter ere nemne sene petbe.

## 4

*Nema nowselri wule mesginte.*

<sup>1</sup> Kraiss ere eteri wusomke mus eisau metbetem, eke ere eteri porerek abobetemkap, kem etep abon mure pette. Mus metem tatame eme wule yaper sene beke nen. <sup>2</sup> Etepkap kem gwo nowselke temente, kem nowselri porere sene mane nente. Kem God eteri porerewouke tobote. <sup>3</sup> God erne beke abo tatame etem nenbekap, kiyi kem etep nenbetem. Eme sir yibe, eme wule yaper pap wayebe, eme ok yaper an sisi pebe, eme lomduwo tesen wule yapersaper nente abobe, eme belebalebe, eme sukye yaper worabe. Kiyi kem etepke nenbetem, e yau. <sup>4</sup> Sene kem etemken etepkap wule yapersaper beke nen, eke eme kemne abolawoibe, eme kemne nogwape tuma yaper wobe. <sup>5</sup> Metye. Yuri eme God eteri bitimi tobok teten God ere etemri nenbetemkap wometen emne tuma namdete nenbe. Ye. God ere kelpe tetan tatameken kiyi saiwom tatameken emne sin late nenbe. <sup>6</sup> Eteke saiwom tatame eme God eteri tuma yenbo kiyi metem. Etem tebetemkap God ere si lan emne tuma namdete nenbe. Wou sene petem tatame eme God eterken som temente.

*God ere nemne epkap epkap mure newomkap, nema Kristen geisimase emne etepkap murek noub nente.*

<sup>7</sup> Jisas ere sene yate yabel mekin mekinnye. Eke kem porere yenbo ten noub abote. Etep tete, kem God erken tuma noub namdete. <sup>8</sup> Eisau wos wuri kem kiyi nente.

Kem awoawo noub abon kobo labetete. Noub abon kobo labe wule ere nogwape wule yaper emne teitkwunbe. <sup>9</sup> Kemne yan lan tatame kem emne pap yewon awos newon an tukna emi newote. Kem pap yenbo ten etep nenbetete. <sup>10</sup> God ere kemne wurare wurare epkap epkap mure newom. Kem ete mure noub peten awoawo kobo late. Kem etep nente, kem God eter pap yewobe wule noub lakeren yaku yenbo nente. <sup>11</sup> Tuma wusoubé tame eme God eteri wobe tumawou wusoute. Kobo labe tame, eme God ere emne newobe murek yaku noub kerete. Etep tete, Jisas Kraiss eterke God ere sig yenbo pette. Ye. God ere kom panen som site nenbe. Eri sig eisau som temente. Nema etep wobe. E seken.

*Nema Kraiss eterkap mus meten taskwurem, nema metekwaste.*

<sup>12</sup> Ari tamesip yenbo, be wos kemne seilan kem mus eisau mette, kem mane wouken akte. E be wos berai. Kem mane ep abo ep abote. <sup>13</sup> Berai. Kem metekwaste. Kem Kraiss eteri metbetem muskap mette, kem Kraiss eteri tamesip tete. Yuri Kraiss ere sig eisau tete, kerem kir, kem metekwaswaite. <sup>14</sup> Kem Kraiss eteri wakse tebe, tatame eme kemne tuma workwoyeken reste, kem metekwaste. Nema etep late, nema mette, sig eisauken Wou, ere God Eteri Wou, ere keremken tetan. <sup>15</sup> Metye. Keremri tatame eme wule yaper mane nente. Tatame eme alwo pen sabe, sir petbe, wule tousibe, o kerebe tuma wobe. Etep tebe tatame eme mus eisau mette nenbe. Kem etepkap mus mane kir mette. <sup>16</sup> Kem Kristen wule tobobe, eme kemne yaper nenen kem mus mette wote, kem sebera mane yate. Berai. Kem Kraiss eteri wakse, eke kem God erne pir won eri sig eisau wobetete.

<sup>17</sup> God ere tatame nogwape emne sin late nenbe. Eteri wakse ere emne kiyi sin late. Sene ere eri tuma yenbo nas-

woibe tatame emne beke nente? Ere emne yapersubuwai nente nenbe. <sup>18</sup> God eteri tuma etep wobe.

Wule yenbo nenbe tatame eme yenbo agetage beke te. Etep tebe, wule yaper nenen God erne magel taibe tatame eme yenbo beke kip te.

<sup>19</sup> Etepkap, God ere kiyi mus mette wom Kristen tatame, kem wule yenbo som tobobetete. Keremne seikim God eterne kem kenawaike som abobetete. Ere kemne yenbo nente wom, ere etep tete nenbe.

## 5

*Kem Kristen lakerebe tame, kem Kristen tatame emne noub lakerebetete.*

<sup>1</sup> Sene an keremri Kristen lakerebe tame emne tuma wuri wote. Aren kir, an Kristen lakerebe tame. Nema yaku kere tamesip. Krai ere mus metbetem, an etep ari lek lam. Krai eri mure eisau genik tete, an etep kir lan mure kir peten metekwaste nenbe. Etepkap an kemne yaku tuma wuri wote. <sup>2</sup> An kemne wobe. Kem God eteri tatame emne noub lakerebetete. Eme sipsipkap, God ere emne keremri letke rasen lakerete wom. Tatame eme kemne mane egiyen kem yaku ek kerebetete. Berai. Keremri porerek kem yaku metekwasen kerebetete. God ere etep wobe. Kem tokwo pette mane abote. Kerem, kem yaku papke abon muresen kerebetete. <sup>3</sup> Kem keremri kulke tetan tatame emne mane teitkwunen emne tuma mane nubke wote. Kem God eteri wule yenbowou tobon emne wule yenbo kuyese peterate. Kem etepkap tete, eme kerem nenbe wulekap kir noub etep tobote. <sup>4</sup> Etep tete, Kristen Lakerebe Apeilake Eisau ere genik tete yabelke kem som temente sig yenbo pette nenbe.

*Nema maim wusom God eteri letke raste.*

<sup>5</sup> Kem tametobo yen, kem etepwou nente. Kem Kristen lakerebe tame etemri kulke temente. Ye. Kem akei, kem

maime teitkwunen awoawo kobo labetete. God eteri tuma etep wobe.

Maime gabebe tatame God ere emne teitkwunbe.

Maime teitkwunbe tatame emne God ere pap yewon noub nenbe.

Etep wobe. <sup>6</sup> Kem mureken God eteri kulke temente. Kem keremri sig maima teitkwunte. Etep tete, God eter wote yabelke ere kemne sig eisau wote nenbe. <sup>7</sup> Ere kemne noub abobe, eke kemri akei abolawoibe wosken nenlawoibe wosken kem eteri letke raste.

<sup>8</sup> Kem noub la. Kem eisa eisa. Kemri peiktame, Satan, ere mekinke sewurbe. Boulri laion ere sewuren taye pitbekap, Satan ere etepke tebe, ere tatame emne tan om ate sopen sewurbe. <sup>9</sup> Kerem mus metbekap, nogwape nowselri Kristen geisimase eme epkap epkap mus kir metbe. Kem etep meten, eke kem God erne kenawaike abon noub teten Satan erne wotakete. <sup>10</sup> Kem mus meten kerake tete, pap kenake metbe God eter, ere kemne eyaren nenewayen tetruwun mure sene newote nenbe. Ye. Krai eterke God ere kemne wopeten kem eteri kom yebok yin noub som temente nenbe. <sup>11</sup> Eteri mure eisau e som temente nenbe. E seken.

*Tuma tep gwo.*

<sup>12</sup> Sailas ere ane kobo lan an gwo tuma kerawai kemne bas rasbe. An wobe, ere tuma noub metbe mase. Kem pap yenbo tete, an etep abobe, eke an gwo tuma kemne bas rasbe. E God eteri pap yewobe tuma seken. Kem e tuma noubwai sebetete.

<sup>13</sup> Babilon komke tetan Kristen etemne kir, God ere emne wopetem, eme kemne pir wobe. Ari yen, Mak, eter kir, ere kemne pir wobe. <sup>14</sup> Kristen pap yewobe wulek kem awoawo pir won tak awoawo kerete.

Kem Krai erken tetan tatame, kem pap yenbo temente. Pita ere bas rasem tuma ab eteke.

GOD ETER AGERKE NAMDERASEM TUMA YENBO  
The New Testament in the Yawu Dialect of the Yessan-Mayo  
Language of Papua New Guinea  
Nupela Testamen long tokples Yawu long Niugini

copyright © 1996 Wycliffe Bible Translators, Inc.

Language: Yawu (Yessan-Mayo) (Yessan-Mayo)

Dialect: Yawu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 20 Jul 2019 from source files dated 12 Jul 2019

61a9dc70-9585-5876-8394-faa75a1766e5